

Christe confusæ medicina mentis,  
 dulce solamen, requies amica,  
 suavius nomen teneris Sicanæ floribus Hyblæ;  
 Mole noxarum coopertus atrâ  
 quò gemens ibo veniam precatum,  
 me nisi occurrens miserum sereno lumine cernas.

Pulcerrimos reddit contaminatissimos peccatores, quia *lux* ipsius est omnium pulcerrima, quòd omnes sui partes (si ita loqui liceat) sibi semper & ubiq; habeat quàm simillimas: *Deus enim est, & non mutatur, Homo purissimus est, & macula in eo non invenitur.* Unus lucis ictus in tantum diffunditur, ut totius mundi spatium in uno momento repleatur. Provoco ad *oculos faciei*. Christi gratia undiquaq; diffunditur, quâ Eos & Hesperus terminatur *Psal. CIII. & XXXVI. & CHX*). Provoco ad *oculos fidei*. *Κάλλιστον ἴδεν τοὺς φῶς*: quæcunq; studia atq; opera hanc *lucernam* oluerint, optimè olebunt coram Deo, cœtu angelico & piorum omnium concilio. Est enim lumen *sapientie*, lumen *justitie*, lumen *gratie*. Sapientia illa non nascitur in capite fictitij Jovis, ut eam Vulcanus exterebret, sed in corde æterni Patris, ut eam Filius fratribus suis impetret. Quicumque ab hoc sole justitiæ illuminantur, horum facies resplendent instar Cherubinorum & Seraphinorum, & conversatio sancta innocentie puritate instar nivis excandescet. Sol hic plenus est veræ gratiæ, *pacem* multiplicans & *spem* accendens, ut moveamur ac progrediamur de virtute in virtutem. Profectò quod *sol* est in *cælo*, *ratio* in *homine*, *oculus* in *capite*, *gubernaculum* in *navi*, *auriga* in *curru*, hoc est in nobis lumen gratiæ divinæ. Hæc divina gratia *rori* similis est: hic *tellurem* humectat, illa *mentem* irrigat. *Flori* similis est: hic *arborem* decorat, hæc *animum* exornat. *Fonti* similis est: ut enim aqua hujus sordes corporum purificat, ita illius latex conscientie maculas expurgat. *Ponti* assimilatur: eo quidem profluentes transimus, sed hæc infernales fluvios evadimus. *Clavi* quoque: hæc seras & fores recludit, illa cœlos aperit. Egredimini ergo Noctigenæ ex tenebris vestræ *inscitie*, egredimini & ex-